

आकाशवाणी

खबरां जगमोहन शर्मा कोला

1. सरकार नै पच्छिम एशिया संघर्श दे चलदे उर्जा सप्लाई च आवा' रदी रूकावटें गी ध्यानै च रखदे होई सार्वजनिक क्षेत्र दी तेल कंपनिएं गी 30 दिनें दा एलपीजी भंडार संरक्षित रखने लेई आखेआ ऐ।

2. सेहत ते परिवार कल्याण मंत्रालय नै राश्ट्री परिवार सेहत सर्वेक्षण 6 जारी कीता ऐ जेहदे च जच्चा-बच्चा दी सेहत सरबंधित आंकड़ें च सुधार दर्ज कीता गेआ ऐ।

3. म्यांमार दे राश्ट्रपति मिन आंग हलांग अज्जै थमां 5 दिनें दे भारत दौरै पर। अज्ज ओह महाबोधी मंदर च दर्शन करा' रदे नं

4. मौसम विभाग नै उत्र प्रदेश, बिहार, ओडिशा, तमिलनाडू, पुदुचेरी, कराईकल ते अंडमान निकोबार च अज्ज भारी बरखा बरने दे असार दस्से न।

5. हांगकांग च 22मीं एशियाई अंडर-20 एथलैटिक्स चैंपियनशिप च भारत दा शानदार प्रदर्शन जारी, 4 सुन्ने दे 2 चांदी ते 2 कैंह दे तगमें कन्ने भारत दे कुल 8 तगमे न।

Govt. Oil

सरकार नै पच्छिम एशिया संघर्श करी दुनिया भरै च कच्चे तेल ते ईंधन दी सप्लाई च आवा'रदी रूकावटें गी ध्यानै च रखदे होई सार्वजनिक क्षेत्र दिएं तेल सप्लाई कंपनिएं गी 30 दिनें दा एलपीजी भंडार संरक्षित करने दा निर्देश दिता ऐ। पेट्रोल ते कुदरती गैस मंत्रालय दी संयुक्त सचिव सुजाता शर्मा नै नमीं दिल्ली च मीडिया गी जानकारी दिती की भारत च कच्चे तेल दे भंडारन दी छमता बधाने पर बी कम्म जारी ऐ। उनें आखेआ ऐ कि मुल्खै च पेट्रोल, डीजल, एलपीजी, कच्चे तेल ते कुदरती गैस दा सुद्धा भंडार मजूद ऐ।

<><><><><><>

NFHS

सेहत ते परिवार कल्याण मंत्रालय नै राश्ट्री परिवार सेहत सर्वेक्षण दे 6में चरण दे आंकड़े जारी करी दिते न जिंदे मूजब जच्चा-बच्चा दी सेहत, खुराक ते माली सुरक्षा च भारत नै तेज प्रगति कीती ऐ। सर्वेक्षण मजब अस्पतालै च यचगी कराने दी प्रतिशत 88 कोला बधियै 90 प्रतिशत पुज्जी गई ऐ। सर्वेखण मूजब 12 कोला 23 म्हीनें दे बच्चे गी लग्गने आहले टीके दा आंकड़ा बी उप्परोतली बधदा जा'रदा ऐ ते एह् 96 प्रतिशत कोला उप्पर पुज्जी गेआ ऐ।

<><><><><><>

HM-BSE

गृह मंत्री अमित शाह होरें आखेआ ऐ जे सरकार सीमा सुरक्षा बल-बीएसएफ गी होर मती जिम्मेदारियां देने पर बचार करा' रदी ऐ तां जे ओह नमीं उभरा करदी चुनौतिएं दा असरदार ढंगगै' नै मुकाबला करी सकै। गुजरात दे भुज च भारत-पाकिस्तान बन्ने कश बड़े मते रणनीतिक महत्व आली दऊं नमीं सरहदी चैकिं दा उद्घाटन करने परेंत बीएसएफ कर्मिं कन्नै गल्लबात करदे होई श्री शाह होरें एह गल्ल आखी। उनें आखेआ जे बीएसएफ दी स्थापना दे 60में बरे च लैता गेदा एह फैसला बन्नै दी सुरक्षा दे बीएसएफ दे विशे गी पूरी चाल्ली बदलियै रक्खी देग।

<><><><><><>

Myanmar-Prez.

म्यांमार दे राष्ट्रपति मिन आंग हलांग 5एं दिनें दे अपे भारत दौरै पर अज्ज बड्डलै हुनै कोला किश चिर पैहले बिहार दे गया पुज्जे। गया ब्हाई अड्डे पर पुज्जने दे बाद उंदा सिद्धे बोधगया लेई रवाना होने दा कार्जक्रम ऐ जित्थै ओह महाबोधि मंदर च दर्शन करंगन। उन्दे कन्नै बौद्ध प्रतिनिधियें दा इक उच्ची सतह दा शिष्टमंडल बी मजूद ऐ। राष्ट्रपति आंग हलांग हुंदे दौरै गी दिखदे होई पूरे बोधगया च सुरक्षा दे निग्गर बंदोबस्त कीते गेदे न ते ते पूरे इलाके गी नो फलाई जोन घोशित कीता गेआ ऐ। इस यात्रा दे बाद नमीं दिल्ली लेई रवाना होई जाडन। राष्ट्रपति दा ओहदा साम्भने परेंत भारत दा एह उंदा पैहला-पैहला दौरा ऐ। दिल्ली दे अलावा उंदा मुम्बई जाने दा बी कार्जक्रम ऐ।

<><><><><><>

Pradhan-Samagra Siksha

केंद्री शिक्षा मंत्री धर्मेन्द्र प्रधान होरें समग्र शिक्षा अभियान तैहत पैहा जारी होने ते ओहदे इस्तेमाल गी लेइयै इक्क जायजा मीटिंग लाई। एहदा मकसद समग्र शिक्षा अभियान 3.0 गी होर असरदार, पारदर्शी ते खरे नतीजे देने आहला बनाना ऐ। श्री प्रधान होरें इक सोशल मीडिया पोस्ट च आखेआ जे समग्र शिक्षा अभियान, पी.एम पोषण, उल्लास, पीएम श्री ते होरनें प्रोग्रामें राएं इक्क एकीकृत दृष्टिकोण राएं कम्म कीता जा करदा ऐ। उनें आखेआ जे मुख्य भरै दे स्कूली शिक्षा सरिस्ते गी बड़ा मता तालमेल ते असर यकीनी बनग।

<><><><><><>

Weather

मौसम विभाग नै पच्छमी उत्तर प्रदेश, बिहार, ओडिशा, तमिलनाडू, पुदुचेरी, कराईकल ते अंडमान निकोबार दीप समूह दे इलाकें च अज्ज भारी बरखा दी पेशगोई कीती ऐ। मैहकमे नै पंजाब, हरियाणा, दिल्ली, राजस्थान, विदर्भ ते छत्तीसगढ़ दे केई इलाकें च अज्ज ऐन गड़ा पोने दे बी असार दस्से दे न।

<><><><><><>

PM-MKB

प्रधानमंत्री नरेन्द्र मोदी होर कल ऐतवारें दिनै 11 बजे आकाशवाणी दे अपने 'मन की बात' कार्यक्रम राएं देश-बदेश च रौहने आहले लोकें कन्नै बचार सांझे करडन। एह इस माहवार रेडियो कार्यक्रम दी 134मीं किश्त होग, जेहदा प्रसारण आकाशवाणी ते दूरदर्शन दे समूलचे

नेटवर्क उप्पर कीता जाग। एहदे अलावा प्रधानमंत्री हुं'दे दफतर, सूचना ते प्रसारण मंत्रालय ते आकाशवाणी ते दूरदर्शन दे यू-ट्यूब चैनलें पर बी एहदा प्रसारण होग। इस कार्यक्रम गी आकाशवाणी खबरें दी वैबसाइट www.newsonair.com ते newsonair मोबाईल ऐप्प पर बी प्रसारित कीता जाग। आकाशवाणी आसेआ हिंदी प्रसारण दे तुरत मगरा, एहदा इलाकाई भाशाएं च अनुवाद बी प्रसारण कीता जाहग। इलाकाई भाशाएं च एहदा अनुवाद प्रसारण रातीं 8 बजे परतियै बी प्रसारत होग।

<><><><><><>

Athletics

हांगकांग च चला करदी 22मीं एशियन अंडर-20 एथलेटिक्स चैंपियनशिप च भारत लगातार जबरदस्त प्रदर्शन करा करदा ऐ। भारत नै चार सुन्ने दे, दो चांदी दे ते दो कैह दे तगमें समेत कुल 8 तगमे जित्ती लैते न। तगमें जितने आहली सूची च भारत दुए नम्बर पर ऐ। पैहली थाह उप्प चीन ऐ। मुकाबले दे दुए ध्याड़े कल भारत नै 7 तगमें जित्ते।

<><><><><><>

IPL

आईपीएल-2026 दा फाइनल मुकाबला कल रायल चैलेंजर्स बेंगलुरु ते गुजरात टाइटन्स बशकार खेड्ढेआ जाहगं मैच कल ऐतवारें 31 मई गी संझा साड्ढे 7 बजे गुजरात दे अहमदाबाद शैहर दे नरेंद्र मोदी स्टेडियम च शुरू होग। कल संझा न्यू चंडीगढ़ च खेड्ढे गेदे दुए क्वालिफायर मकाबले च गुजरात दी टीम नै राजस्थान गी 7 विकटें कन्ने हराई दिता।

<><><><><><>

AQI

राजधानी दिल्ली ते एनसीआर च ब्हाऊ दी गुणवत्ता च सुधार होने करियै उत्थै लागू कीती गेदी ग्रैप इक्क दी सब्भनें पाबंदिये गी तुरत प्रभाव कन्ने हटाई दिता गेआ ऐ। कल दिल्ली च ब्हाऊ दी गुणवत्ता मतल्लक सूचकांक 123 हा, जेड़ा इस म्हीने दी 28 तरीक गी 207 हा। भारत दे मौसम सरबंधी मैहकमें नै बी पेशनगोई कीती ऐ जे औने आहले दिनें च ए.क्यू.आई दरम्यानी श्रेणी च रौहने दी मेद ऐ।

<><><><><><>